

ՀԱՅՈՑ ԳՐԵՐԻ ԳՅՈՒՏԻ ԹՎԱԿԱՆԸ

Բանասիր. գիտ. դոկտոր Ա. Ա. ՄԱՐՏԻՐՈՍՅԱՆ

Մատենագրության մեջ գրերի գյուտի ժամանակի մասին բազմաթիվ տվյալներ կան, բայց առաջին աղբյուրը Կորյունն է: Կորյունի համաձայն Դանիելյան գրերը Հայաստան են բերվում Վռամշապուհի թագավորության հինգերորդ տարում՝ «ի հինգերորդ ամի թագաւորութեան նորա»¹: Մաշտոցն ստեղծում է հայերեն լեզվի նշանագրեր և վերադառնում Հայաստան Վռամշապուհի վեցերորդ տարում՝ «ի վեցերորդ ամի Վռամշապուհ արքային Հայոց Մեծաց»: Գրքի վերջում Կորյունն ունի ժամանակագրական ամփոփում. «Եւ արդ լինի համար ամաց հաւատոց երանելոյն ամք քառասուն և հինգ և ի դպրութենէն Հայոց մինչև ցվախճան Կրբոյն՝ ամք երեսուն և հինգ, որք համարին այսպէս, թագաւորեալ Կրմանայ Պարսից արքայի ամս վեց, և Յազկերտի ամս քսան և մի և յառաջնումն ամի երկրորդ Յազկերտի որդւոյ Վռամայ վախճանեցաւ երանելին:

Եւ արդ առնու համար ամաց սրբոց հաւատոց ի շորրորդում ամէն Կրմանայ արքայի մինչև ցառաջին ամս երկրորդ Յազկերտի որդւոյ Վռամայ, և դպրութեանն Հայոց յութերորդ ամէ Յազկերտի առեալ սկիզբն»²:

(«Եւ արդ երանելիի հավատքի տարիների հաշիվը լինում է քառասուն և հինգ և հայոց դպրությունից մինչև Սրբի վախճանը՝ երեսուն և հինգ, որ այսպես են համարվում. Պարսից արքա Կրմանը թագավորել է վեց տարի և Հազկերտը քսան և մեկ տարի, և Վռամի որդի երկրորդ Հազկերտի առաջին տարում վախճանվեց երանելին:

Եվ արդ՝ սուրբ հավատքի տարիների հաշիվն սկսվում է Կրման արքայի շորրորդ տարուց մինչև Վռամի որդի երկրորդ Հազկերտի առաջին տարին, և Հայոց դպրությունն սկսվել է Հազկերտի ութերորդ տարուց»):

Կորյունն իր ժամանակագրությունը տալիս է պարսից գահակալների տարիներով: Բերում ենք Պարսից արքայացանկը Վռամ Կրմանից մինչև Հազկերտ II.

Վռամ (Վահրամ) Կրման, IV	388—399
Հազկերտ I	399—420
Վռամ (Վահրամ), V	420—438
Հազկերտ II	438—457

Ժամանակագրական այս ցանկը կազմել է Թ. Նյուլդեքեն 1874 թ.³ և մրնում է անփոփոխ: Յուստին, Գրումելը, ինչպես և Բիկերմանը հետևում են

¹ Կորյուն, Վարք Մաշտոցի, բնագիրը ձեռագրական այլընթերցվածներով, թարգմանությամբ, առաջաբանով և ծանոթագրություններով ի ձեռն պրոֆ. Մանուկ Աբեղյանի, Երևան, 1941, էջ 44:

² Նույն տեղում, էջ 98:

³ Th. Nöldcke, Geschichte der Perser und Araber zur Zeit der Sasaniden, aus der Arabischen Chronik des Tabari, Leyden, 1879.

Նյուրգեքերն⁴, Ռ. Ֆրայի, Խրիստենսենի, Վ. Լուկոնինի մոտ շեղումը արտահայտվում է միայն մեկ տարով. Վահրամ V-ը Հազկերտ I-ին հաջորդում է 421 թ., փոխանակ 420 թ.⁵։ Դուրսորդ Փիրմիան և դուրսորդ Դաբիր Սայադը իրենց «Իրանի լիակատար պատմության» մեջ լիովին փոխ են առնում Նյուրգեքերի աղյուսակը, որից և քաղում է Պարսկերենի լիակատար ընդարձակ բառարանը (Լուդաթ Նամայե դեհ խոդա)։

Բանասերները Կորյունի տվյալները համադրում են Թ. Նյուրգեքերի աղյուսակին, և ստացվում են անհարիր թվեր։

Կորյունն ասում է, որ Մաշտոցի կրոնավորության շրջանը սկսվում է Վռամ Կրմանի շորորոդ տարուց, որից տասը տարի հետո է տեղի ունեցել գրերի գյուտը։ Բայց Վռամ Կրմանի շորորոդ տարուց մինչև Հազկերտ I-ի ութերորդ տարին անում է 14։ Գրերի գյուտը տեղի է ունեցել Հազկերտ I-ի ութերորդ տարում և գյուտից մինչև Մաշտոցի մահը անցել է 35 տարի, իսկ Մաշտոցը մահացել է Հազկերտ II-ի առաջին տարում։ Հազկերտ II-ի առաջին տարին 438/9-ն է, իսկ Հազկերտ I-ի ութերորդ տարուց 35 տարի հետո անում է 442 և այլն։ Կարծես ակնհայտ է բնագրական շփոթը, և բանասերները ստորերը ընթերցումներ են առաջարկում։

Նորայր Բյուզանդացին Վռամ Կրմանի տարիները ուղղում է տասը, փոխանակ՝ վեց, հավատքի տարիները՝ քառասունյոթ, փոխանակ՝ քառասունհինգ, իսկ գրերի գյուտը գնում է Հազկերտի վեցերորդ տարում, փոխանակ ութերորդ⁶։ Այդ հաշվով, եթե Մաշտոցի մահվան տարին համարենք 439 թ., հայոց դպրության սկիզբը կլինի 404 թ.։

Հ. Թորոսյանը նույնպես «ամս վեց»-ի փոխարեն առաջարկում է «ամս տասն», իսկ գյուտից մինչև Մաշտոցի մահը՝ 32. «Ի դպրութենեն հայոց մինչև ցվախճան սրբույն՝ 32»։ Նա փոխում է նաև Վռամշապուհի գահակալության վեցերորդ տարին՝ ինը⁷։ Այստեղ էլ ելակետային թիվը՝ Մաշտոցի մահվան տարին, 439 է, և գյուտը ընկնում է 407 թ.։ Թորոսյանը հաշվի մեջ լռելյայն կատարում է շեղում։ Նա Վռամ Կրմանի գահակալության առաջին տարին՝ 388, փոխում է 389 և սկսում 390-ից և որովհետև Վռամ Կրմանի շորորոդ տարուց է սկսվում Մաշտոցի հավատի շրջանը, ապա 45 թիվը լրանում է 439-ին։

Ն. Ակինյանը, ինչպես Ն. Բյուզանդացին, Մաշտոցի կրոնավորության տալիս է 47, մատենագրության սկզբից մինչև Մաշտոցի մահը՝ 32 տարի, Վռամ Կրմանի գահակալությանը՝ 10, թողնում է նույնը «յութերորդ ամի է ծազկերտի» և նույնպես 439-ը՝ Մաշտոցի մահվան տարին ընդունելով իբրև էլակետային թիվ, գրերի գյուտը արտածում է 307/8 թ.⁸։

⁴ F. Justi, Iranisches Namenbuch, Marburg, 1895, S. 421. V. Grumel, L. Chronologie, Paris, 1953, p. 376. Э. Бикерман, Хронология Древнего мира, М., 1975, стр. 198.

⁵ Р. Фрай, Наследие Ирана, М., 1972, стр. 368. В. Г. Луконин, Культура Сасанидского Ирана, М., 1969, стр. 198—199.

⁶ Նորայր Բյուզանդացի, Կորին վարդապետ և նորին թարգմանութիւնք, Տիգրս, 1900, էջ 387։

⁷ Հ. Թորոսյան, Քանի մը խնդրական կետեր Կորյան գրքին մեջ, «Բազմավեպ», 1932, էջ 257—259։

⁸ Ն. Ակինյան, Ս. Մաշտոց վարդապետ, Վիեննա, 1949, էջ 160—161։

Հ. Մարկվարտը Հազկերտի ութերորդ տարին (Ը) կարդում է հինգ (Ե), Մաշտոցի կրոնավորության սկիզբը դնում է 391/2 թ., Մաշտոցի մահը՝ 439, իսկ գրերի գյուտը՝ 402/3 թ.⁹։ Բայց եթե Մաշտոցը կրոնավորել է 391/2 թ., ապա 45 տարի հետո անում է 436/7, իսկ 402/3-ից երեսունհինգ տարի հետո՝ 437/8 և ոչ թե 439:

Հ. Աճառյանը, ինչպես ավելի վաղ Ս. Մալխասյանը, Վռամշապուհի առաջին հինգերորդը դարձնում է երրորդ, իսկ Հազկերտի ութերորդը՝ վեցերորդ, Վռամ Կրմանին տալիս է տասը տարվա գահակալություն և նույնպես կարծում, որ Վռամ V-ի հատվածը սղվել է բնագրից: Աճառյանը Մաշտոցի մահը դնում է 439 թ. և բնականաբար գրերի գյուտը՝ 404¹⁰:

Ա. Աբրահամյանը պահպանում է Հազկերտ I-ի ութերորդ տարին և Մաշտոցի մահվան համար ընդունում 440 թ.: Նրա հաշվով գյուտը տեղի է ունեցել 406-ին¹¹: Բայց եթե Հազկերտ I-ի գահակալությունը սկսվում է 399 թ., ապա նրա ութերորդ տարին անում է 407, իսկ եթե 440-ից երեսունհինգ տարի հետ դնանք, կստացվի 405: Աբրահամյանը անուշադիր է թողնում Մաշտոցի կրոնավորության շրջանը, որով կարելի էր ստուգել ստացված արդյունքը: Այսպես, եթե հաշվենք նույն եղանակով, Վռամ Կրմանի շրջանը տարին կանի 391: Գրերի գյուտը տեղի է ունեցել տասը տարի հետո, ուրեմն ոչ թե 406, այլ 400 թ., իսկ Մաշտոցի մահվան տարին ստացվում է 435 թ.:

Գառնիկ Ֆնտզլյանը միակն է, որ պահպանում է Կորյունի տվյալները և իր ներկայացրած բնագրի մեջ որևէ ուղղում թույլ չի տալիս: Բայց նրա հաշվումները նույնպես պայմանական են: Վռամ Կրմանի առաջին տարին՝ 388 նա դարձնում է 389/90, որպեսզի Հազկերտի թագավորության առաջին տարին ստացվի 396: Այդ հաշվով գրերի գյուտը ընկնում է 404, իսկ Մաշտոցի մահը՝ 439 թ.¹²:

Բուրդուլին այլ լուծում են առաջարկում Գ. Տեր-Մկրտչյանը¹³ և Ն. Ադոնցը¹⁴, Ադոնցի հետևությունները և՛ Հ. Մանանդյանը¹⁵: Նրանք, հենվելով Կորյունի բնագրի այլ տվյալների վրա, մերժում են նրա ժամանակագրությունն առհասարակ և ստանում անսպասելի թվեր: Գ. Տեր-Մկրտչյանի կարծիքով գրերի գյուտը տեղի է ունեցել 413 թ., իսկ Ադոնցը այն տեղադրում է նախորդ դարի մեջ՝ 392—398: Մանանդյանը հարմար է գտնում 391/2-ը:

9 Հ. Մարկվարտ, Հայոց այբուբենի ծագումը և ս. Մաշտոցի կենսագրությունը, «Մեսրոպ Մաշտոց», հոգվածների ժողովածու, Երևան, 1962, էջ 177—179:

10 Հ. Աճառյան, Հայոց գրերը, Երևան, 1968, էջ 360—383:

11 Ա. Աբրահամյան, Հայ գրի ստեղծման տարեթիվը, «Մեսրոպ Մաշտոց», հոգվածների ժողովածու, Երևան, 1963, էջ 128:

12 Կորյուն, Վարդ Մաշտոցի, ուղղեալ և լուսաբանեալ ի Գառնիկ Ֆնտզլեանէ, Երուսաղեմ, 1930, էջ 75—77:

13 Գ. Տեր-Մկրտչյան, Հայ գրերի 1500-ամյակի առթիվ, պատասխան Լեոյի բաց նամակին, «Արարատ», 1912, № 56:

14 Ն. Ադոնց, Մաշտոց և նրա աշակերտները ըստ օտար աղբյուրների, Մեսրոպ Մաշտոց, հոգվածների ժողովածու, Երևան, 1962:

15 Հ. Մանանդյան, Հայ գրերի գյուտի տարեթիվի հարցի շուրջը, «Մեսրոպ Մաշտոց», հոգվածների ժողովածու, Երևան, 1962:

Գ. Տեր-Մկրտչյանը համաձայն է, որ հայոց դպրության սկիզբը պետք է փնտրել 404-ից 406 թթ. միջև: Բայց նա գտնում է, որ խոսքը դանիելյան գրերի մասին է, իսկ Մաշտոցն իր այբուբենը ստեղծել է շատ ավելի ուշ: Մաշտոցը Ասողիքում հանդիպեց Եղեհայի եպիսկոպոս Բաբելասի և Ամիրի եպիսկոպոս Ակակիոսի հետ. «Այս եպիսկոպոսների անունը ամենալավ հենման կետն է Մաշտոցի ճանապարհորդության ժամանակը որոշելու համար»: Գ. Տեր-Մկրտչյանը գտնում է, որ 404—406 թթ. ընթացքում Մաշտոցը չէր կարող տեսակցել Եղեհայի եպիսկոպոս Բաբելասի հետ: Դա Բաբելասն է, որ Եղեհայում եպիսկոպոս է կարգվել 412 թ.: Այդ դեպքում գրերի գյուտը 412 թ. առաջ չէր կարող լինել: Գ. Տեր-Մկրտչյանը Եղեհայից Մաշտոցի վերադարձը Վառձապուհի վեցերորդ տարում (2) դարձնում է 16 (ժՁ): «Այդպիսի մի խմբագրություն դեռ Չամչյանն է առաջարկել,— գրում է նա,— թեև նրա հայ գրի ամբողջ ժամանակագրական կառուցվածքը անընդունելի է»¹⁶:

Բայց շատ ավելի անընդունելի է Գ. Տեր-Մկրտչյանի ժամանակագրական կառուցվածքը: Այո, Բաբելասը Եղեհայի եպիսկոպոս է կարգվել 412 թ., իսկ Պետերսի կարծիքով դեռ 414 թ. վերջում նա Եղեհայի եպիսկոպոս չէր: Բայց այդ Բաբելասը Բաբելասի հետ կապ չունի: Բաբելասը աղավաղված է, ճիշտ ձևը պետք է լինի ոչ թե Բաբելաս, այլ Պակիդաս, որ Եղեհայի եպիսկոպոսական աթոռին է նստել 398—409 թթ.: Փոփոխությունը տեղի է ունեցել Բաբելաս շատ ավելի նշանավոր եպիսկոպոսի ազդեցությամբ, թե զրչական սխալ ընթերցում է, դժվար է ասել: Թորոսյանը և Ակինյանը վրիպակ են համարում և կարծում են, որ դա ծագել է Պակիդաս անվան հնչական աղավաղմամբ: Աբրահամյանը և Ն. Տեր-Մինասյանը համաձայն են նրանց: Նահապետյանը և Ֆնտզյանը ավելի հակված են ընդունելու, որ Բաբելասը իր հռչակով մոռացություն է տվել Պակիդասին և լցրել նրա տեղը: Իսկ Աճառյանը Բաբելաս անունը համարում է հետին հավելված: «Ինչ որ ալ լինի,— գրում է Ֆնտզյանը,— անկարելի է հայ այբուբենի գյուտը Բաբելասի եպիսկոպոսության ստույգ թվականի հետ միաբանելու համար՝ դնել այնքան ուշ, որքան 412»¹⁷: Անունների այդ շփոթի մասին գիտեք դեռ Մ. Չամչյանը, բայց նա դրան որևէ նշանակություն չի տվել: «Այստեղ պետք է նկատել կասկած չհարուցող մի վրիպակ»,— գրում է Հ. Մարկվարտը¹⁸ և Գ. Տեր-Մկրտչյանը իր վարկածը կառուցում է կասկած չհարուցող վրիպակի վրա:

Այդպես է վարվում և Ն. Ադոնցը: Նա գտնում է, որ Մաշտոցը V դարի առաջին տասնամյակին չէր կարող Ասողիքում այցելել ոչ միայն Բաբելասին, այլև Ամիրի եպիսկոպոս Ակակիոսին: «Եթե Մաշտոցը Ամիրում ներկայացել է Ակակին և Եղեհայում Ռաբուլին, այդ կարող էր լինել 420-ից ոչ առաջ և ոչ ուշ քան 435: Եվ եթե իրավ այդ ճանապարհորդության հետ է կապված տառերի գյուտը, ակներև է, որ նա չէր կարող տեղի ունենալ Հազկերտի ութերորդ տարին,— ժամանակական անհեթեթություն»¹⁹: Պետք էր սպասել, որ Ադոնցը դրերի գյուտի ժամանակը կտաներ ետ, 420-ից 435 թթ. միջև, բայց տառնում է առաջ մինչև 392-ից 398 թթ.: Այդպես է նա ուղղում ժամանակական

16 Գ. Տեր-Մկրտչյան, նշվ. աշխ., էջ 511:

17 Կորիւն, Վարք Մաշտոցի, ուղղեալ և լուսաբանեալ ի Գառնիկ Ֆնտզեանէ, էջ 83:

18 Հ. Մարկվարտ, նշվ. աշխ., էջ 178:

19 Ն. Ադոնց, նշվ. աշխ., էջ 223:

անհեթեթությունը: Այդ վարկածը չընդունվեց բանասիրության կողմից, որ հենվում էր պարզ թյուրիմացության վրա: «Արդարև,— գրում է Ադոնցը,— արտաքին աղբյուրներից քաջահայտ է, որ Ակակը Ամիդի եպիսկոպոսն էր մոտավորապես սկսած 419/420 թվականից: 420 թվին իբրև նույն քաղաքի եպիսկոպոս ներկա էր Յահրալայի ժողովին: Թաղեոս կայսեր և Վուամ թագավորի զինական բախումների ժամանակ Ակակը հանդիսանում է նաև իբրև քաղաքական գործիչ և 422-ին կայսեր կողմից Վուամի մոտ ղրկվում է և թերևս որոշ դեր ունենում խաղաղության դաշինք կնքելու նույն թվին»²⁰:

Աղբյուրներից, սակայն, քաջահայտ է, որ Ակակոսը Ամիդի եպիսկոպոսական աթոռ է բարձրացել ոչ թե 419/420, այլ 400 թ. մայիսի 9-ին, Մարասից հետո: 420 թ. իբրև Ամիդի եպիսկոպոս նա կարող էր ներկա լինել Յահրալայի ժողովին, և 422-ին իբրև կայսեր պատվիրակ գնալ Վուամ V-ի արքունիքը, բայց դա կապ չունի նրա եպիսկոպոսության առաջին տարվա հետ: 409 թ. Հազկերտ I-ին ուղղված թղթի տակ Անտիոքի Պորփյուր, Հալեպի Ակակիոս, Եղեսիայի Պակիդաս, Թելլայի Նվսեբիոս եպիսկոպոսների կողքին կա նաև Ամիդի Ակակիոս եպիսկոպոսի անունը²¹:

«Ադոնցը հայտնի չէ գիտությունը թե անգիտությամբ, եղծում է Ակակի եպիսկոպոսության թվականը»,— գրում է Հ. Աճառյանը²²:

Հ. Մանանդյանը Կորյունի ժամանակագրական հատվածը փոխում է անճանաչելիության աստիճանի: «Եւ արդ լինի համար ամաց հաւատոց երանելւոյն ամք քառասուն և հինգ», նա դարձնում է. «Եւ արդ լինի համար ամաց ի դպրութենէ Հայոց մինչև ցվախճան սրբոյն ամք ԿԸ (48)»: Նշանակում է Կորյունը տվել է ոչ թե Մաշտոցի կրոնավորության տարիների հաշիվը, այլ միայն՝ գրերի գյուտի, և գրերի գյուտից մինչև Մաշտոցի մահը անցել է 48 տարի և ոչ թե 35: Իսկ Հազկերտի ութերորդ տարին սղում է բնագրից և բնագիր է մուծում մյուս Վուամի տարիները: Մանանդյանը այնուհետև իր եզրակացության մեջ գրում է. «Ինչպես տեսնում ենք, Մաշտոցյան գրերի գյուտի տարեթիվը ճշտիվ որոշվում է ոչ միայն Կորյունի «Վարք Մաշտոցի» երկի վերև բերված բուն բնագրի վկայությամբ, այլ նաև համաձայն Կորյունի վերջաբանի վերականգնված բնագրի ժամանակագրության»²³:

Ն. Ադոնցի և Հ. Մանանդյանի ժամանակագրական վարկածի դեմ հետագայում հանդես եկան Ե. Տեր-Մինասյանը և Ա. Աբրահամյանը, որոնք, սակայն, նոր բան չեն ավելացնում գյուտի թվագրման հարցի մեջ:

Այսպես, Զամչյանից մինչև մեր օրերը, բացի առանձին շեղումներից, բանասերները գրերի գյուտի կամ հայ դպրության սկզբնավորման տարեթիվը փորձում են արտածել՝ հենվելով Կորյունի ժամանակագրական տվյալների վրա: Տատանման կորագիծը 404—407 է: Բանասերներից շատերը նախընտրում են 404-ը: Երբ չկար միասնական տոմար և ժամանակագրություն, երբ հաշիվները պայմանական էին և անցել է ավելի քան 15 դար, նման տատանումը ոչինչ չարժե: Բայց ինքնին հետաքրքիր է բանասիրության համար: Կորյունի հիման վրա ստացված տարբեր թվերը ոչ թե բնագրական անհակա-

²⁰ Նույն տեղում, էջ 222—223:

²¹ Տե՛ս Ն. Ակիւնյան, Ս. Մաշտոց վարդապետ, Վիեննա, 1940, էջ 111—112:

²² Հ. Աճառյան, Նշվ. աշխ., էջ 378—379:

²³ Հ. Մանանդյան, Նշվ. աշխ., էջ 109—110:

մետ տվյալների հետևանք են, այլ նրա բնագրի ոչ ճիշտ մեկնության: Կորյունի ժամանակագրական հատվածը, ինչպես հատուկ է նրան, բարդ է և կարծես երկիմաստ, որ ենթադրում է հետագա աղարտում: Բանասերները փորձում են ուղղել, փոխանակ բացատրելու, և ստացվում են բազմաթիվ տարբերակներ:

Այսպես, գրեթե բոլորը գտնում են, որ բնագրում թագավորների տարիների թվարկման հատվածից՝ «Վուամ Կրմանը թագավորել է վեց տարի և Հազկերտը՝ քսան և մեկ տարի և Վուամի որդի երկրորդ Հազկերտի առաջին տարում վախճանվեց երանելին», տող է ընկել. «Բնագրի մեջ պակասում են Վուամ թագավորի տարիները, — գրում է Աբեղյանը: Պետք է լինի Հազկերտի տարիներից հետո այսպես. «Եւ Վուամայ ամս ութ և տասն»: Հ. Թորոսյանը առաջարկում է բնագրում վերականգնել այդ տողը: Ն. Ակինյանը Կորյունի քննական հրատարակության մեջ ավելացնում է՝ «Եւ Վուամայ ամս ժթ», իսկ Աբեղյանը՝ «Եւ Վուամայ ամս ութ և տասն»: Ն. Բյուզանդացին քաղվածք է բերում լրացնելով՝ «Եւ Վուամայ հինգերորդի՝ ամս քսան», Հ. Մանանդյանը հետևում է նրան՝ «Եւ Վուամայ ամս Ի»: Բնագրին չի միջամտում միայն Գ. Ֆնտզյանը:

«Սկզբնապես անպայման եղել է այդ, — գրում է Աբեղյանը, — թե չէ Մաշտոցի կրոնավորության տարիների հաշիվը սխալ կլինի, մինչդեռ դրանով ճշտվում է 45 թիվը՝ $6+21+18=45$ »²⁴:

Այսպես, բանասերները կարծում են, որ Կորյունի կողմից Վուամ Կրմանի և Հազկերտ I-ի գահակալության հիշատակումը Մաշտոցի կրոնավորության հաշվի համար է, և պակասում են Վուամ V-ի տարիները, որ դրանով ճշտվի 45 թիվը: Բայց դա կրոնավորության հետ կապ չունի: Մաշտոցի կրոնավորության ժամանակն արդեն տրված է. Վուամ Կրմանի չորրորդ տարուց մինչև նրա վախճանը՝ Հազկերտ II-ի առաջին տարին: Բոլորովին անիմաստ է, թե Մաշտոցը պարսից որ թագավորի ժամանակ որքան է կրոնավորել: Կորյունը այդպիսի ժամանակագրություն չէր տա: Իսկ եթե նա թվարկում է պարսիկ թագավորների տարիները Մաշտոցի կրոնավորության ընթացքում, նշանակում է դրանով հաշվում է պարսից թագավորների գահակալության շրջանը, որ նույնպես անմտածելի է: Եվ, վերջապես, ինչ էլ լինի, դա չի լրացնում 45 թիվը: Կորյունն ասում է, որ Մաշտոցի կրոնավորությունն սկսվել է Վուամ Կրմանի 4-րդ տարուց, ուրեմն վեցից պետք է չորս հանել և ընդհանուր գումարը կստացվի 41 ($2+21+18$):

Այստեղ է, որ բանասերները առաջարկում են մյուս ուղղումը. վեցի փոխարեն կարդալ տասը, նկատելով, որ վեցը հետագա անհարազատ թիվ է: Աճառյանը գտնում է, որ Կորյունը վեցը մտցրել է հավատի տարիների մեջ, իսկ երբ ասում է, որ Կրմանի չորրորդ տարում սկսվեց Մաշտոցի կրոնավորությունը, ապա ամբողջացնում է Կրմանի գահակալության շրջանը՝ տասը: Նկատենք, որ տասը նույնպես անհարազատ է, քանի որ Տաբարին տալիս է տասնմեկ: Բայց դա մի կողմ:

Անկարելի է բացատրել, թե ինչպես տասը (Ժ) հետագա գրչության մեջ կարող էր փոխարինվել վեցով (Զ): Ծիշտ չէ նաև, որ Կորյունը Վուամ Կրմանի թագավորության տարիները տալիս է անջատ՝ վեց և չորս թվերով: Նրա արտահայտության ձևը բոլորովին այլ է: Կորյունը թվարկում է Վուամ Կրմանի և Հազկերտ I-ի տարիները. «Թագաւորեալ Կրմանայ Պարսից արքայի ամս վեց

²⁴ Կորյուն, էջ 123:

և Յազկերտի ամս քսան և մի»։ Եթե Հազկերտի տարիները նրա ամբողջ թագավորության շրջանն է, ապա այդպես է և Կրմանի համար։ Այլ դեպքում Կորյունը պետք է ասեր. «ամս վեց ի թագաւորութենէ Կրմանայ»։ Դա կարող է նշանակել, որ նա վերցնում է կրոնավորության շրջանին վերաբերող վեց տարիները և ոչ ամբողջը։ Բացի այդ, բնագրից բոլորովին չի երևում, որ Վուսա Կրմանի և Հազկերտի տարիների հիշատակումը վերաբերում է միայն Մաշտոցի կրոնավորության շրջանին. «Եւ արդ լինի համար ամաց հաւատոց երանելւոյն ամք քառասուն և հինգ, և ի դպրութենէն Հայոց՝ մինչեւ ցվախճան սրբոյն՝ ամք երեսուն և հինգ, որք համարին այսպէս»։ Ուր համարին այսպէս — որոնք այսպես են հաշվվում։ Դա հավասարապես պետք է վերաբերի և՛ Մաշտոցի կրոնավորությանը, և՛ դպրությանը, բայց մտածել, որ թագավորների տարիների նույն գումարը միաժամանակ կարող է լրացնել և՛ 45, և՛ 35 թվերը, անմտածելի է։

Վուսա Կրմանի և Հազկերտ I-ի թագավորության տարիների հիշատակումը ճիշտ որ վերաբերում է Մաշտոցի կրոնավորությանը և դպրությանը։ Որք համարին, — դա կրոնավորությունն է և դպրությունը, և առաջինը հաշվվում է Վուսա Կրմանի ժամանակով, երկրորդը՝ Հազկերտի։ Եվ ահա, Կորյունը տալիս է նրանց գահակալության տևողությունը, որպեսզի նշի, թե նրանց որ շրջանին են համընկնում այդ երկու իրադարձությունները։ Վուսա Կրմանի չորրորդ տարում սկսվեց Մաշտոցի կրոնավորությունը, իսկ Հազկերտի ութերորդ տարում եղավ գրերի գյուտը։ Մյուս Վուսի կամ Վուսա V-ի հետ ժամանակագրական խնդիր չի կապված, և Կորյունը բաց է թողնում նրա գահակալության շրջանը։ Նրա անունը հիշատակվում է միայն որպես երկրորդ Հազկերտի հայր, որի թագավորության առաջին տարում վախճանվեց Մաշտոցը. «Եւ յառաջնումն ամի երկրորդ Յազկերտի որդւոյ Վուսայ վախճանեցաւ երանելին»։ Վուսա Կրմանի և Հազկերտ I-ի թագավորության տարիները հենման կետ են, որոնցով արտահայտվում է Մաշտոցի կրոնավորության և գրերի գյուտի ժամանակը և ոչ թե պարզ թվեր Մաշտոցի կրոնավորության շրջանը լցնելու համար։ Դա երևում է Կորյունի ժամանակագրական սխեմայից։ Այդտեղ կա մի օրինաչափություն, որ զարմանալիորեն չի նկատվել։ Վուսա Կրմանի չորրորդ տարում սկսվել է Մաշտոցի կրոնավորությունը, իսկ Հազկերտի ութերորդ տարում տեղի է ունեցել գրերի գյուտը։ Առաջինը մինչև Մաշտոցի մահը տևել է քառասունհինգ տարի, երկրորդը՝ երեսունհինգ։ Ուրեմն կրոնավորությունից գրերի գյուտ կազմում է տասը տարվա շրջան։ Վուսա Կրմանի չորրորդ տարուց տասը տարին հանգում է նույն կետին, ինչ Հազկերտի ութերորդ տարին։ Նշանակում է անպատճառ վեց տարի է թագավորել Վուսա Կրմանը, քանի որ այդ դեպքում միայն Վուսա Կրմանի չորրորդ տարուց տասը տարին կարող է հանգել Հազկերտի ութերորդ տարուն։ Դա լավագույն ապացույց է, որ Կորյունը Վուսա Կրմանի թագավորության տարիները գիտի վեց, ինչպիսին էլ լինի իրականում, միաժամանակ նշանակում է, որ բնագրում ճիշտ է Հազկերտի ութերորդ տարին, և Վուսա V-ի թագավորության տարիները նախապես չեն եղել։

Կորյունի ժամանակագրական սխեման հարազատորեն պահպանել է իր նախնական ձևը և որևէ փոփոխություն կամ խմբագրություն անտեղի է։

Բայց վերադառնանք Վուսա Կրմանի ժամանակագրությանը։

Ասվեց, որ Տաբարին նրա թագավորության տևողությունը հաշվում է տասնմեկ տարի: Նյուլդեքեն հետևում է Տաբարիին, իսկ Կորյունը աներկբայորեն գիտի վեց: Այս անհամաձայնությունը փորձ է արվում լուծելու Տաբարիի օգտին, բայց Տաբարին հետագա պատմիչ է՝ X դարի հեղինակ, իսկ Կորյունը՝ սկզբնաղբյուր: Վռամ Կրմանը, անշուշտ, վեց տարի է թագավորել: Դժվար չէ բացատրել հետագա շփոթումը: Ներսեհի թագավորությամբ (393—402) ավարտվում է առաջին Սասանյանների շրջանը: Այնուհետև պարսից արքաների հաջորդականությունը մինչև Հազկերտ II ունի այսպիսի տեսք.

Որմիզդ II	Վռամ IV
Շապուհ II	Հազկերտ I
Արտաշիր II	Վռամ V
Շապուհ III	Հազկերտ II

Այս հաջորդականությունը տալիս է Տաբարին²⁵: Բերենք մի ուրիշ ցանկ VII դարի Անանուն ժամանակագրությունից²⁶:

Որմիզդ Շապուհեան	Յազկերտ Վռամեան
Շապուհ Որմիզդեան	Վռամ Յազկերտեան
Արտաշիր ի Շապուհեան	Յազկերտ Վռամեան
Վռամ յԱրտաշրեան	

Թվարկման ձևից (Որմիզդ Շապուհեան, Արտաշիր ի Շապուհեան) երևում է, որ Անանուն հեղինակը ձեռքի տակ ունեցել է հնագույն պարսկական աղբյուր: Տաբարիի և Անանունի ժամանակագրական ցանկերը նույնն են, բայց կա մի շեղում: Անանուն ժամանակագիրը բաց է թողնում երկրորդ Շապուհին, որ Սասանյան զահնամակում Շապուհ III-ն է: Այս վրիպումը պատահական չէ: Շապուհ II-ը, որ մանկույթ կամ դեռ չծնված զահ էր բարձրացել, իր երկարամյա հռանդուն գործունեությամբ մեծ տպավորություն է թողել սերունդների վրա և դարձել վիպական կերպար, և այդ պատճառով Շապուհ III-ը սահում է հիշողությունից և ձուլվում իր պապի անվանը: Այդպես է ամբողջ հայ պատմագրության մեջ:

Ղազար Փարպեցին գրում է, որ Հայաստանի բաժանումից հետո պարսից հատվածի նախարարները իրենց թագավոր են խնդրում Արշակունու, «ըստ բնիկ նախնի կարգին յազգէն Արշակունեաց», և Շապուհ թագավորը տալիս է խոստովին. «Եւ արքային Պարսից Շապուհ կատարեալ զհայցուածս նոցա՝ շնորհէր նոցա թագաւոր խոստով անուն յազգէն Արշակունեաց»²⁷: Որոշ ժամանակ անց՝ «յետ ժամանակի ինչ անցելոյ», նախարարներն ամբաստանում են խոստովին: Շապուհը զահագուրկ է անում և նշանակում Վռամշապուհին²⁸: Այստեղ Փարպեցին պատմում է գրերի գյուտի, Սահակի և Մաշտոցի գործու-

²⁵ Th. Nöldke, նշվ. աշխ., էջ 52—117:

²⁶ «Անանուն ժամանակագրություն», խմբագիր յօրինել է դարու ի հնագույն ժամանակագրաց և հրատարակեալ ներածութեամբ և բաղդատութեամբ Բարսեղ Սարգիսեան:

²⁷ «Ղազարայ Փարպեցու Պատմութիւն Հայոց և Թուրք առ Վահան Մամիկոնեան», աշխատութեամբ Վ. Տեր-Մկրտչեան և Ստ. Մալխասեան, Թիֆլիս, 1904, էջ 8:

²⁸ Նույն տեղում, էջ 13:

նեության, Աստվածաշնչի թարգմանության մասին, նկատելով, որ այդ ամենը կատարվեց Վռամշապուհի ժամանակ՝ «Կատարեալ այս ամենայն ի ժամանակս Վռամշապուհոյ»։ Այնուհետև Վռամշապուհը դեռ երկար թագավորում է և մեռնում խոր ծերության մեջ. «Եկաց յետ այսորիկ թագաւորն Վռամշապուհ ամս բազումս (որոշ ձեռագրերում՝ ամս քսան և մի, այդպես գիտի և հորենացին) և հասեալ ի յերկար ծերութիւն՝ վախճանեցաւ յանկողնի իւրում խաղաղական հանգստիւ յաշխարհիս Հայոց»։ Վռամշապուհից հետո մեռնում է և Շապուհ արքան, որին հաջորդում է Վռամ Կրմանը. «Յետ այսորիկ մեռաւ և Շապուհ արքայն Պարսից, և թագաւորեաց Վռամ որդի նորա, որ էր Կրման արքայ»²⁹։

Շապուհ III-ի իշխանությունը տևում է հինգ տարի, ինչպես նշում է Տաբարին, և անկարելի է, որ ժամանակագրական այս նեղ հետազոտում Շապուհը թագադրեր խոսքովին, ապա Վռամշապուհին, անցնելով ամս բազումս կամ 21 տարի, Վռամշապուհը մեռնելու խոր ծերության մեջ և ապա նոր ավարտվել Շապուհի թագավորության շրջանը։ Հասկանալի է, Փարպեցին Շապուհ III-ին տալիս է Շապուհ II-ի երկարակեցությունը։

Խորենացու մոտ նույնպես Շապուհ III-ը ներծուլվել է Շապուհ II-ին։ Նրանց միջև ընկած է Արտաշիր II-ը։ Խորենացին նրան ներկայացնում է ոչ որպես տրբա, այլ Շապուհի որդին, որ գալիս է Հայաստան, պատժում խոսքովին և թագ շնորհում Վռամշապուհին³⁰։ Խորենացուն աղբյուրներից հայտնի է, որ այդ ժամանակներում գործել է Արտաշիրը իբրև Պարսից արքա, իսկ ապա՝ նորից Շապուհ։ Մտածելով, որ դա նույն Շապուհն է, նա Արտաշիրին ժամանակավորապես հանում է մեջտեղից իբրև գահակալ և Շապուհները միանում են, իսկ Արտաշիրը վերստանում է իր իրավունքը. «Արտաշիր Պարսից արքայ, որ յետ եօթանասուն ամի թագաւորութեան հօրն կալաւ զտէրութիւնն ամս շորս»³¹։

Եղիշեն նույնպես գիտի մեկ Շապուհ։ Նա երեք անգամ առիթ է ունեցել տալու այդ անունը։ Առաջին և երրորդ դեպքերում խոսքը վերաբերում է Շապուհ II-ին, երկրորդ դեպքում՝ Շապուհ III-ին։ Բայց տարբերակման ոչ մի սահման չկա։

Ահա այդ նույնացումը, որ կարծես հայ պատմիչների մոտ ընդհանուր է, արտահայտված է և ժամանակագրություններում։ Ինչպես VII դարի Անանուն ժամանակագիրը, որ ենթադրվում է Անանիա Շիրակացի, այնպես էլ Սեբեոսը, կամ գուցե մի ուրիշ անանուն ժամանակագիր³², իրենց ցանկից սղում են Շապուհ III-ի անունը։

Սասանյան գահակալներից թերևս ոչ մեկն այնքան մեծ և ճակատագրական դեր չի խաղացել հայոց պատմության մեջ, որքան Շապուհ II-ը։ Նրա հետ է կապվում երեսնամյա պատերազմը իր ողջ վիպականությամբ, և հայոց մեջ Շապուհ նշանակում է Շապուհ II Երկարակյաց, և նրա թոռը, որ իր համար բոլորովին անպատեհ նույն անունն էր կրում, որ պահի նրա հիշատակը,

²⁹ Նույն տեղում, էջ 18։

³⁰ «Մովսիսի Խորենացու Պատմութիւն Հայոց», աշխատասիրութեամբ Մ. Արեղեան և Ս. Յարութիւնեան, Տիպիս, 1913, էջ 321։

³¹ Նույն տեղում, էջ 322։

³² «Պատմութիւն Սեբէոսի», աշխատասիրութեամբ Գ. Վ. Աբգարյանի, Երևան, 1970, էջ 61։

դրվում է սեփական հիշատակից: Շապուհ III-ը, կարելի է ասել, ներծուլվել է Շապուհ II-ին անձամբ, բայց ոչ՝ ժամանակագրորեն: Ինչպես տեսանք, Շապուհ III-ը հաջորդում է Շապուհ II-ին Արտաշիր II-ից հետո: Արտաշիրը մընացել է իր տեղում գահակալական շորս տարիներով: Արտաշիրի գահակալական շրջանն այդպես գիտեն և՛ Խորենացին, և՛ Անանունը, և՛ Տաբարին: Իսկ Շապուհ III-ի ժամանակը մնում է բաց: Հաջորդը գալիս է Վուսթ Կրմանը: Շապուհ III-ն իշխել է հինգ տարի³³, Վուսթ Կրմանը՝ վեց: Եվ ահա, Շապուհ III-ի այդ հինգ տարին տրվում է Վուսթ Կրմանին, և գումարը ստացվում է տասնմեկ: Այգտեղից է գալիս Վուսթ Կրմանի տասնմեկ տարին: Տաբարին, օգտվելով տարբեր աղբյուրներից, վերականգնում է Շապուհ III-ին իր տեղում և իր տարիներով, իսկ Վուսթ Կրմանի ժամանակը մնում է տասնմեկ:

Կորյունի միջոցով հնարավոր է դառնում վերականգնելու պարսից արքայացանկի ժամանակագրական ճիշտ պատկերը:

Այժմ տեսնենք, թե ժամանակագրական ինչ հատվածում են տեղակայվում Վուսթ Կրմանի տարիները:

Թ. Նյուդեբեհն Հազկերտ I-ի գահակալության սկիզբը դնում է 399 թ. 399 թ. Վուսթ Կրմանի վերջին տարին է: Նշանակում է Վուսթ Կրմանը գահակալել է 393—399 թթ.: Բայց այդ ժամանակահատվածը, եթե հիմք ընդունենք Նյուդեբեհի աղյուսակը, ճիշտ չի ստացվում: Մաշտոցի կրոնավորությունը սկսվել է Վուսթ Կրմանի շորորդ տարուց, ուրեմն 397 թ. և տևել 45 տարի՝ մինչև Մաշտոցի մահը: Իսկ Մաշտոցը մեռել է Հազկերտ II-ի առաջին տարում: Բայց 397-ից 45 տարի հետո ստացվում է 442, իսկ Հազկերտ II-ի թագավորության առաջին տարին նշված է 438/9: Ինչպես տեսնում ենք ելակետերից մեկը՝ Հազկերտ II-ի առաջին տարին, կամ Վուսթ Կրմանի վերջին տարին սխալ է:

Տեսնենք, թե ինչպես է թվագրվում Հազկերտ II-ի առաջին տարին:

Եղիշեն գրում է, որ Հազկերտը իր թագավորության տասներկուերորդ տարվա սկզբին՝ «ի սկզբան երկոտասներորդ ամի», հալածանք սկսեց քրիստոնյաների դեմ³⁴: Հայ նախարարները պատվիրակ են հղում Թեոդոս կայսեր մոտ օգնություն հայցելու, որ դեռ ոչինչ չձեռնարկած վախճանվում է՝ «ի նմին ժամանակի անդէն վաղվաղակի հասանէր վախճան կատարածի կենաց նորա»³⁵: Թեոդոս II-ը մեռել է 450 թ.: Եթե Հազկերտը հալածանքը սկսել է «ի սկզբան երկոտասներորդ ամի», ապա ուրեմն՝ տասնմեկերորդ տարուց անմիջապես հետո, և նրա առաջին տարին կլինի 439 թ.:

Ղազար Փարպեցին պատմում է, որ Ավարայրից հետո Հազկերտը խաբեությունը Տիգրան է կանչում ապստամբներին, և Վասակ Սյունին ապստամբությունը մասնակցած նախարարներին և կրոնավորներին ճանապարհելուց հետո ինքը ևս գնում է Հազկերտի տասներեքերորդ տարում: Ավարայրի ճակատամարտը տեղի է ունեցել 451 թ.: Եթե Հազկերտը խաբեությունը է իր մոտ կանչել նախարարներին, ապա դա դժվար թե հնարավոր լիներ պատերազմից

³³ Tabari, էջ 71:

³⁴ «Եղիշէ՛ր վասն Վարդանայ և հայոց պատերազմին», աշխատութեամբ Ե. Տեր-Մինասյան, Երևան, 1957 թ., էջ 18:

³⁵ Նույն տեղում, էջ 73:

անմիջապես հետո: Պետք է որ որոշ ժամանակ անցներ վստահություն շահելու համար: Փարպեցին Վասակի Պարսկաստան գնալը հատուկ թելադրում է՝ «Յերեքտասաներորդում ամի Յազկերտի արքային Պարսից»: Դա ինքնին նշանակում է ուրիշ ժամանակ և ոչ թե Ավարայրի ճակատամարտի տարին, այլապես նա կասեր ի նոյն ամի: Պետք է մտածել, որ ապստամբություն անաշնորհները և Վասակ Սյունին Պարսից արքունիք են գնացել հաջորդ տարին՝ 452 թ. և եթե 452 թ. Հազկերտի տասներեքերորդ տարին է, ապա նրա առաջին տարին անում է 439: Փարպեցին Հովսեփ Վայոցձորեցու և Ղևոնդյանց նահատակությունը զնում է Հազկերտի տասնվեցերորդ տարում. «Եւ այսպէս, ի վեշտասաներորդում ամի թագաւորութեան Յազկերտի, որ օր քսան և հինգ էր ամսոյն հրոտից՝ պսակեցան սուրբքն վեցեքեան»³⁶: Ստեփանոս Ասողկեր Ղևոնդյանց նահատակությունը զնում է «յամսեանն Հրոտից, որ օր ժՁ էր ամսոյն նոյն յուլիսի, յաւուր կիրակէի»: Ն. Ակինյանը նկատում է, որ հրոտից 16-ը հետագա գրչի սխալ է Հազկերտի 16 թվի ազդեցության տակ և պետք է լինի հրոտից 25, ինչպես Փարպեցու մոտ: Իսկ հրոտից 25-ը համընկնում է 454 թ. հուլիսի 25-ին, որ իսկապես կիրակի է: Եվ եթե 454 թ. Հազկերտի տասնվեցերորդ տարին է, ապա նրա առաջին տարին լինում է 438 թ.:

Կարխայում տեղի են ունենում քրիստոնյաների նահատակություններ Հազկերտի ութերորդ տարում՝ ար ամսի 24-ին, ուրբաթ օրը, 25-ին՝ շաբաթ օրը և էլուլ ամսի 25-ին՝ երկուշաբթի օրը: Գուղշմիդի հաշվով դա 446 թ. է: Ակինյանը թվագրում է մեկ տարով ուշ՝ 447 թ. և եթե 447-ից ութ տարի ետ գանք կստացվի 439՝ Հազկերտի թագավորության առաջին տարին:

Տեր Փեթոնը և Ատուրհոմիդդ մոզպետը «Հիսուսի համար մեռնում են հուլյների 759 թ.՝ պարսից թագավոր Հազկերտի իններորդ տարում, որ է պարսիկների (Սասանյանների) 223 թ.»³⁷:

Հուլյների 759-ը՝ Հազկերտի իններորդ տարին, 448 թվականն է: Ուրեմն Հազկերտը գահակալել է 439 թվականին: Իսկ Սասանյանների առաջին տարին որոշակի չէ: Այն տատանվում է 224-ից 227-ի միջև և առայժմ անիմաստ է նրանով հաշվել:

Կարծում ենք բավարար է: Հազկերտի գահակալության առաջին տարին թ. Նյուդեքեի մոտ ճիշտ է թվադրված՝ աննշան տատանումով՝ 438/9: Թերևս ասորական վկայաբանությունները կարող են կասկածի ենթարկվել, բայց դա քուրդովին անտեղի կլինեք Եղիշեի և Ղազար Փարպեցու նկատմամբ: Եղիշեն հեռու չի կանգնած իրադարձություններից: Նրա պատմությունը հենց վերաբերում է Հազկերտի կողմից քրիստոնյաների հալածանքներին և հայերի բխմանը, և նա կարող էր ասել, թե Հազկերտի որ տարում այն տեղի ունեցավ:

Ի. Հարությունյանը³⁸, Հ. Աճառյանը³⁹ և Ն. Ակինյանը⁴⁰ առանձին անդրադարձել են Հազկերտ II-ի առաջին տարվա թվագրման խնդրին, Ի. Հարություն-

³⁶ Ղ ա զ ա ր Փ ա ր պ ե ց ի, էջ 101:

³⁷ Bedjan, Acta Martyrum et Sanctorum, t. II, Parisius, 1891, p. 559.

³⁸ Ի. Հ ա ր ո խ յ ո լ յ ա ն, Հայոց գիրք, Թիֆլիս, 1892, էջ 348—351:

³⁹ Հ. Ա ճ ա ռ յ ա ն, Նշվ. աշխ., էջ 350—399:

⁴⁰ Ն. Ա կ ի ն յ ա ն, Շահապիվանի ժողովին կանոնները, մատենագրական ուսումնասիրություն, արթիվ 1500-ամյա տարեդարձին, «Հանգես ամսօրյա», 1949, № 4—12, էջ 93—95:

յանը և Շ. Աճառյանը գրերի, իսկ Ն. Ակինյանը՝ Շահապիվանի ժողովի առիթով: Հազկերտի գահակալության առաջին տարին սահմանելու համար Շ. Աճառյանի բերած երկու փաստարկները վերաբերում են Նղիշեին և Ղազար Փարպեցուն, որոնք ընկած են Թ. Նյուդեքեի և ապա՝ Ի. Հարությունյանի թղթագրման հիմքում, երրորդ փաստարկը ելակետ է համարում 393 թ. իբրև Վռամ Կրմանի շորորոգ տարի, որից 45 տարի հետո հանգում է Հազկերտ II-ի առաջին տարվան: Հասկանալի է, այստեղ նախադրյալը Վռամ Կրմանի տասնամյա թագավորության շրջանն է, որ ինչպես տեսանք ճիշտ չէ: Չորրորդը Ասողիկի մի աղեղեկությունն է, որ հենց ինքը՝ Աճառյանն է ասում՝ «ժամանակակից լինելով մեծ արժեք չունի»: Ասողիկի համաձայն Հազկերտի տասնհինգերորդ տարին համապատասխանում է Մարկիանոսի երրորդ տարուն: Մարկիանոսի երրորդ տարին 453-ն է, որից 45 տարի եթե ետ գնանք, կստացվի Հազկերտի գահակալության սկիզբը: Աճառյանն անվստահելի է համարում և Ղևոնդյան վկայաբանության առթիվ Փարպեցու հաղորդած տվյալը, քանի որ նրա թվերը որոշ ձեռագրերում տարբեր են:

Ն. Ակինյանը նախ հենվում է Ղազար Փարպեցու տվյալների վրա: Նա բերում է Կորյունի վկայությունները Սահակի և Մաշտոցի մահվան ժամանակի մասին, ինչպես և Շահապիվանի ժողովի տարեթիվը (որոնք ինքնին դեռ սահմանման կարիք ունեն) և որոշ տվյալներ ասորական վարքագրություններից՝ Կարխայի և Փեթոնի վկայաբանությունները: Կարխայի վկայաբանությունը ծանոթ է Թ. Նյուդեքեին: Ակինյանը չգիտես ինչու անտեսում է Նղիշեի տվյալը, որ թերևս ամենից ավելի կարևոր է:

Ինչպես տեսնում ենք, տվյալները հաճախ խառնվում են կամ մտնում նույն շրջագծի մեջ: Բայց Ի. Հարությունյանն ու Շ. Աճառյանն ընդունում են 438, Ն. Ակինյանը՝ 439, իսկ Թ. Նյուդեքեն 438/439:

Ինչից է գալիս այս տարամիտությունը:

Պարսիկները սովորաբար իրենց թագավորի դահակալության շրջանը հաշվում են տարվա սկզբից, միևնույն է երբ էլ նա գահ բարձրացած լինի, և նայած թե ինչպես ես հաշվում, գումարմամբ թե տարեհիշերի թվով: Բերենք մի օրինակ. Խորենացին ասում է, որ Տրդատը գահակալել է Դիոկղետիանոսի երրորդ տարին՝ «յերրորդ ամի Դիոկղետիանոսի»: Դիոկղետիանոսը ծիրանի է: հազել 284 թ., նրա «յերրորդ տարին կանի 287 (284+3=287), տարեհիշերի թվով՝ 286 (284, 285, 286): Բանասերները հաճախ դիմում են երկու ձևին էլ, և հաշվումների մեջ կամայական տարր է մտնում:

Բայց գահակալության, ծննդյան և առհասարակ որևէ իրողության թվականը և տարին տարբեր բաներ են: Ղրանք արտահայտում են համապատասխանաբար սկիզբ և տևողություն: Այսպես, 284 թ. Դիոկղետիանոսի կայսրության սկիզբն է, ժամանակագրական ելակետը, իսկ նրա իշխանության տարին լրանում է 285-ին: 284-ից 285 ընկած շրջանը մեկամյա տևողությունն է, առաջին տարին, երկրորդ տարին 286-ն է, երրորդը՝ 287-ը և այդպես շարունակաբար:

Մենք տեսանք, որ ավելի հավանական է 439 թ., որպես Հազկերտ II-ի գահակալության սկիզբ: Քիչ հետո առիթ կունենանք համոզվելու դրանում:

Այժմ փորձենք որոշել Հազկերտ I-ի առաջին տարին, որ Վռամ Կրմանի վերջին տարին է:

Ֆ. Յուստին և Ք. Պատկանյանը Հազկերտ I-ի գահակալության սկիզբը թվագրում են 397⁴¹։ Թ. Նյուդեքենը ընդունում է 399-ը։ Նա հենվում է Սելևկիա-Տիգրեոնի մի ժողովի արձանագրության վրա։ Այդ արձանագրության համաձայն ժողովը տեղի է ունեցել Հազկերտի տասնմեկերորդ տարվա փետրվարի սկզբին, երեքշաբթի օրը։ Էլիասը տալիս է նույն ժողովի ցիկլային տարեթիվը. սելևկյան 721 թ. փետրվարի 1, երեքշաբթի օր։ Սելևկյան 721-ը 410 թ. է, իսկ փետրվարի 1-ը հիրավի երեքշաբթի և եթե 410-ից տասնմեկ տարով առաջ գնանք կստացվի 399⁴²։ Հետագայում, հավանաբար Թ. Նյուդեքեի ազդեցությամբ, Յուստին և Պատկանյանը հրաժարվում են իրենց թվագրումից⁴³։

Հին պարսիկներն այդպես էլ պատմագրություն չունեցան։ Նրանց պատմությունը վերականգնվում է օտար աղբյուրների, հազվագյուտ սեփական արձանագրությունների և դրամների հիման վրա։ Գահակալների ժամանակագրական անցումները որոշելու համար դրամները հատկապես կարևոր են։ Գահը ժառանգած տիրակալի առաջին գործն էր իր պատկերով դրամ թողարկել, որ ազդարարում է նրա իշխանությունը. «Ձի զերկուս վայս այսպէս պահէին սուլորաբար,— գրում է Խորենացին,— զի յորժամ նստէր արքայ նոր՝ նոյն ժամայն փոխէին զդրամ դտեալ ի գանձս արքունի, զնորայն տալաւորեալ պատկեր և զգիր դիւանին յայլ փոխեալ նորա անուամբ, սուղ ինչ զանազանեալ, ոչ բառնալով զհինն։ Իսկ եթէ յամիցէ ի տէրութեանն ամս բազումս, և արասցէ աշխարհագիր նոր՝ թողուն զայն, որ ի հնոյն փոխեցաւ, զի միայն նորոյն վերագրեսցի անուն»⁴⁴։ Այդպես, նոր թագավորը փոխում էր դրամը, ինչպես նաև դիվանական գրությունները իր անունով, բայց չընջելով հինը, իսկ որոշ ժամանակ անց ամեն ինչ փոխվում էր։

Սասանյան գահակալների ժառանգավորման կարգի մասին Խորենացու այս տեղեկությունը կարևոր է։ Ինչպես տեսնում ենք, դրամները թվագրման վստահելի միջոց են։ Նոր գահակալը դրամ է կտրում իր պատկերով «նոյն ժամայն»՝ անմիջապես։ Պահպանվել են դրամներ Վուամ Կրմանի և Հազկերտ I-ի պատկերներով։ Եվ եթե Հազկերտ I-ի պատկերը կա դրամի վրա Վուամ Կրմանի հետ, ուրեմն պետք է ընդունել, որ նա 399-ից մեկ-երկու տարի առաջ թագ էր կրում և դա այն շրջանն է, երբ դեռ պահպանվում է նախորդ գահակալի անունը։ Այդպես էին վարվում, անշուշտ, ցույց տալու համար, որ նոր գահակալը օրինական ժառանգորդ է և ոչ գահի հափշտակիչ, և օրինական է ճանաչվում անցած իշխանությունը։ Դա մի տեսակ ժառանգավորման հանգույց է, ավանդույթ, որ դալիս է առաջին Սասանյաններից։ Պահպանվել են Պապակի և նրա ավագ որդու՝ Շապուհի պատկերները դրամի տարբեր երեսներին, և երկուսն էլ կրում են շահ տիտղոսը։ Կա և հակառակ օրինակը։ 293 թ. գահ բարձրացավ Ներսեհը և անմիջապես ջնջեց իր նախորդ գահակալների՝ երեք Վուամների (Վուամ I, Վուամ II և Վուամ III) անունները։ Նա նրանց համարում էր գահի հափշտակիչներ և իրեն հռչակեց իբրև Որմիզդ Արտաշեսի անմիջա-

⁴¹ F. Justy, *Geschichte des alten Persiens*, 1879, S. 193. Ի. Հ ա Ր ու թ յ ու ն յ ա ն, *Դ Վ ա շ խ*, էջ 342։

⁴² Th. Nöldeke, *Դ Վ ա շ խ*, էջ 418—419։

⁴³ F. Justi, *Iranisches Namenbuch*, S. 148. «История Агуан Моисея Каганкат-ваши», СПб., 1861, стр. 326.

⁴⁴ Մ ո վ ս ե ս Խ ո Ր Ե Ն ա Յ ի, էջ 323։

կան հաջորդը: Հետաքրքիր է, որ հայ պատմագրության մեջ և ժամանակագրություններում նույնպես նրանց անունները չկան: Շապուհ I-ին հաջորդում է Որմիզդ Արտաշիրը, ապա անմիջապես՝ Ներսեսը:

242 թ. Գորդիանոսի դեմ Շապուհ I-ի տարած նշանավոր հաղթանակը բարձրաբանդակում վերագրված է Շապուհի հորը՝ Արտաշիր I-ին, որն արդեն մեռած էր: Այդ շրջանում դրամներ են թողարկվել Շապուհի և Արտաշիր I-ի պատկերով: Շապուհը միանձնյա հանդես է գալիս 243 թվականից միայն: Այնպես որ պարսից մոտ իրական գահակալումը և պաշտոնական թագադրումը հաճախ տարբեր են, և դրանց միջև կարող է ժամանակ անցնել:

Հազկերտ I-ի հետ էլ կապվում է նույն իրողությունը: Եվ եթե էլիսը, որ ուշ շրջանի հեղինակ է (XI դար), չի շփոթում, ապա պետք է ընդունել, որ Հազկերտ I-ը դահ է բարձրացել 397 թ., իսկ նրա պաշտոնական թագադրումը տեղի է ունեցել 399-ին:

Հազկերտ I-ին հաջորդել է Վուամ V-ը՝ Գոռ մականունով: Եթե Հազկերտ I-ի գահակալության սկիզբը երկու տարով առաջ է գնում, ապա պետք է որ խախտվեն և նրա հաջորդի գահակալության սահմանները: Բայց բերենք ժամանակագրական մի տեղեկություն. «Ալեքսանդրի 732 թ., որ է Պարսից թագավոր Վուամի երկրորդ տարին, տեղի ունեցավ սուրբ Հակոբի նահատակությունը», — ասված է Հակոբի վարքում, որ Բեյթ Լափաթի Բեյթ Հուզիայից էր»⁴⁵, Ալեքսանդրի 732-ը մեր 420-ն է: Ուրեմն սուրբ Հակոբի նահատակությունը տեղի է ունեցել 420 թ., որ Վուամի երկրորդ տարին է, և եթե երկու տարի առաջ գնանք, կանի 418:

Կորյունը, Խորենացին, Անանուն ժամանակագիրը, Սեբեոսը, Տաբարին և հայտնի բոլոր աղբյուրները Հազկերտ I-ին տալիս են 21 տարի: Դա անհերքա է: Ուրեմն նրա քսանմեկերորդ տարին պետք է ավարտվի 418 թ.: Եվ եթե 418-ից դուրս գանք 21 տարի, կստացվի 397՝ Հազկերտի առաջին տարին: Այս տվյալը վճռաբար հաստատում է 397 թ. իբրև Հազկերտ I-ի առաջին տարի:

Ջի խախտվում նաև Վուամ Գոռի և Հազկերտ II-ի ժամանակագրական հաջորդականությունը: «Ըստ ոմանց Վուամ Գոռը թագավորել է 18 տարի, 10 ամիս և 20 օր, ըստ այլոց՝ 23 տարի, 10 ամիս և 20 օր», — գրում է Տաբարին: Էլիսն ու Յակոբին նրան տալիս են 19 տարի, Ագաթիասը՝ 20, Սեբեոսը և Անանուն ժամանակագիրը՝ 22, Իբն Մուգաֆֆան՝ 23, իսկ Խորենացին՝ 21. «Զքսան և զմի ամ թագաւորեալ Պարսից Վուամ երկրորդ մեռանի թողլով զտէրութիւնն որդւոյ իւրում Յազկերտի»⁴⁶: Եթե Հազկերտ II-ը դահ է բարձրացել 438 թ., ապա Վուամ Գոռը թագավորել է 20 տարի (418—438), իսկ եթե 439 թ., ապա՝ 21 (418—439):

Պարսից արքաների ժամանակագրությունը Վուամ Կրմանից մինչև Հազկերտ II ստանում է այսպիսի տեսք.

Վուամ Կրման (IV) 6 տարի, 391—397

Հազկերտ I, 21 տարի, 397—418

Վուամ Գոռ (V) 21 տարի, 418—439

Հազկերտ II, 18 տարի, 438/9—457

⁴⁵ Bedjan, Acta Martyrum et Sanctorum, t. II, Paris, 1891, p. 539.

⁴⁶ Մ ո վ ա ն ո խ ո Ր Ե Ն ա Յ ի, էջ 255:

Այստեղ դեռ անորոշ է մնում Հազկերտ II-ի առաջին տարին: Վերջապես այն 439 է թե 438: Մենք տեսանք, որ տվյալների մեծագույն մասը հանգում է 439-ին: Այժմ, երբ ունենք նախորդ արքաների ճիշտ ժամանակագրությունը, կարելի է վստահորեն սահմանել: Եթե Վուսթ Գոռը հորենացու համաձայն թագավորել է քսանմեկ տարի, ապա նրա իշխանությունը պետք է ավարտվի 439 թ. և ոչ՝ 438: Բայց կարևոր է Կորյունի տվյալը: Կորյունի համաձայն Սահակը և Մաշտոցը վախճանվել են Հազկերտ II-ի առաջին տարում: Կորյունը այլ մանրամասներ է տալիս Սահակի մահվան ժամանակի մասին: Սահակը մեռնում է նավասարդի վերջին, իր ծննդյան օրը՝ «ի կատարել ամսեանն նաւասարդի որպէս և զօր ծննդեանն երանելոյն յիշէին»:

1853 թ. «Սոփերք Հայկականքի» Բ հատորում տպագրվում է «Պատմութիւն վասն սրբոյն Սահակայ հայրապետին եւ Մեսրոպայ վարդապետին» խորագրով անանուն մի բնագիր, որ գրերի գյուտին նվիրված ներբողյան է: Ներբողյանը մի ուրիշ ձեռագրից հրատարակվում է 1964 թ., վարդան Արևելցու անունով՝ «Նորին վարդանայ վարդապետի ասացեալ բան գովեստի...»: Ներբողյանում ասված է, որ Սահակը մեռել է նավասարդի 30-ին հինգշաբթի օրը՝ «ի նաւասարդի և, յաւուր հինգշաբթի՝ ի պատիւ մաքրութեան հնգից զգայութեանց»⁴⁷: Դյուլորիեն, նկատի ունենալով «Սոփերքում» հրատարակված բընագրի տվյալը, 1859 թ. որոշում է Սահակ Պարթևի մահվան ժամանակը. 439 թ. նավասարդի 1-ը համապատասխանում է օգոստոսի 9-ին, իսկ 30-ը՝ սեպտեմբերի 7-ին, և սեպտեմբերի 7-ը հիրավի հինգշաբթի է:

Կորյունն ասում է, որ Մաշտոցի մահը տեղի է ունեցել Սահակից վեց ամիս հետո՝ «Յետ ամսոց վեցից անցելոյ», մեհեկանի 13-ին՝ «եղեքտասաներորդում ամսեանն մեհեկանի»: Եթե Սահակը մեռել է 439 թ. սեպտեմբերի 7-ին, ապա նրանից վեց ամիս հետո մեհեկանի 13-ն ընկնում է հաջորդ տարվա՝ 440 թ. փետրվարի 17-ին շաբաթ օրը⁴⁸: Այդպիսով Հազկերտի առաջին տարին 439-ն է և ձգվում է մինչև 440 թ.: Դյուլորիենի այս հաշվումները հաճախ հիմք են դարձել գրերի գյուտի ժամանակը սահմանելու: Հետագայում Թ. Նյուլդեբեն ընդունեց 438—439 իբրև Հազկերտի առաջին տարի, որ տարբեր է Դյուլորիենից: Եվ որովհետև Կորյունի մյուս տվյալները ևս չեն հանգեցնում 440-ի, Դյուլորիենի թիվը մոռացության տրվեց:

Վերջին անգամ Դյուլորիենի վրա հենվում է Գ. Տեր-Մկրտչյանը և որոշում... դանիելյան գրերի ժամանակը: «Հաշիվը և դատողությունը շատ ճիշտ է,— գրում է այդ առթիվ Հ. Աճառյանը,— բայց ինչ վստահություն Սահակից ու Մեսրոպից մի երկու դար ուշ եկող հեղինակի տրված այսքան մանր տեղեկություն վրա, երբ այլուստ գիտենք և հաստատում ենք, որ Սահակի մահը 438-ին է»⁴⁹:

Այլուստ, սակայն, մենք տեսանք, որ Հազկերտ II-ը գահակալում է 439-ին, և Սահակի մահը 439-ին է:

⁴⁷ «Վարդանայ վարդապետին ասացեալ բան գովեստի պատմագրաբար վասն սրբոյն Սահակայ եւ Մեսրոպայ և այլոց թարգմանչացն», «Բանբեր Մատենադարանի», № 7, 1964, էջ 391:

⁴⁸ E. Dulaurier, Recherches sur la chronologie arménienne, Paris, 1859, p. 135—136.

⁴⁹ Հ. Աճառյան, նշվ. աշխ., էջ 380:

2. Աճառյանը «Սոփերք հայկականքում» հրատարակված անանուն երկը համարում է հետին շրջանի մի գործ, «գրված Խորենացուց հետո և 850 թվականից առաջ»⁵⁰։ Մեզ հայտնի չէ ինչ հիմքեր ունի նա։ Միևնույն է, ներբողագիրը Վարգան Արևելցին է՝ XIII դարի հեղինակ, թե գալիս է «Սահակից ու Մեսրոպից մի երկու դար ուշ», Սահակի մահվան օրվա մասին նրա «մանր տեղեկությունը» ճիշտ է։

Կորյունը գրում է, որ Սահակի հիշատակը նրա մահից հետո ամեն տարի տոնում էին նույն ամսին. «Որոց և նոյնպէս ամի ամի գումարելովք ի նոյն ամսեան՝ զնոյն յիշատակն տօնախմբեն»⁵¹։ Նույն ամսին, ուրեմն և որոշակի օր, և եթե արդեն Սահակից անմիջապես հետո նրա հիշատակին տոն է սահմանվում, ապա այն ճիշտ ժամանակին կատարելու համար պետք էր նկատի ունենալ թե շաբաթվա որ օրն էր վախճանվել Սահակը։ Այդտեղից է գալիս հինգշաբթի օրվա հիշողությունը, և ներբողյանն էլ վերաբերում է տոնախմբությանը և չէր կարող շփոթել։

Այդ տվյալի վրա թերևս կարելի էր կասկածել, եթե հայտնի չլիներ, որ Սահակի տոնը սահմանվել է նրա մահից անմիջապես հետո և ոչ հետագայում, երբ կարող էին ընդունել որևէ պայմանական, հայսմավորքային թիվ։ Կորյունի վկայությունը հաստատում է ներբողագրին։ Դա ավանդույթ ունի։ Բայց ինչու միայն Կորյունի վկայությունը։ Մենք շատ անգամ տեսանք, որ Հազկերտ II-ի ժամանակը ավելի հանգում է 439 թ.։

Մաշտոցի մահվան տարին՝ 440 թ. հաստատվում է և Կորյունի ուղղակի վկայությամբ։ Ինչպես դիտենք, Կորյունը գրում է, որ Մաշտոցի կրոնավորությունը սկսվում է Վռամ Կրմանի շորորոդ տարուց և մինչև իր մահը տևել է 45 տարի։ Վռամ Կրմանի շորորոդ տարին 395-ն է։ 395-ից 45 տարին հանգում է 440-ին։ Բայց եթե Կորյունի այս տվյալը առարկայանում է այդքան հստակորեն, նշանակում է ճիշտ են և պարսից ժամանակագրության մյուս թըվերը՝ Վռամ Կրմանից մինչև Հազկերտ II։

Այդպես, մենք ունենք Վռամ Կրմանի և Հազկերտ I-ի գահակալության, ինչպես և Մաշտոցի մահվան հավաստի թվականներ։ Եվ այժմ երբ պարզ են բոլոր ելակետերը, այլևս մնում է ուղղակի արտածել հայ դպրության սկզբնավորման ճիշտ ժամանակը։

Կորյունի համաձայն գրերի գյուտը տեղի է ունեցել Հազկերտ I-ի ութերորդ տարում։ Մաշտոցի կրոնավորությունից մինչև գրերի գյուտը տևել է տաս տարի, իսկ գրերի գյուտից մինչև Մաշտոցի մահը 35 տարի. Հազկերտը գահակալել է 397 թ., Վռամի շորորոդ տարին, այսինքն Մաշտոցի կրոնավորության սկիզբը, 395-ն է, և Մաշտոցը մահացել է 440 թ.։ Հաջորդաբար Հազկերտի ութերորդ տարին անում է 405 (397+8), Մաշտոցի կրոնավորությունից տաս տարի հետո՝ 405 (395+10) և եթե Մաշտոցի մահից 35 տարի առաջ գրեանք, դարձյալ հանգում ենք 405-ի։

Գյուտի տարեթիվի մասին Կորյունի մյուս տվյալը ևս հանգեցնում է նույն եզրին։ Մաշտոցն Ասորիք է գնացել Վռամշապուհի հինգերորդ տարում և վերադարձել՝ վեցերորդ տարում, բերելով իր հետ նորաստեղծ այբուբենը։

⁵⁰ Նույն տեղում, էջ 379։

⁵¹ Կորյուն, էջ 88։

Չամչյանը և Գարագաշյանը Վոսմաշապուհի առաջին տարին ընդունում են 392 թ., Գաթրճյանը՝ 391, Ալիշանը՝ 390, Օրմանյանը՝ 389, Մանանդյանը՝ 386 կամ 388: Նրանք ելնում են Ղազար Փարպեցուց, բայց Փարպեցին վստահելի հիմքեր չի տալիս: Նա շփոթում է Շապուհ II-ին (309—379) Շապուհ III-ի (383—388) հետ և խառնում նրանց ժամանակը: Փարպեցու համաձայն Վոսմաշապուհը թագ է ստացել Շապուհի կողմից խոսրովին գահընկեց անելուց հետո:

Մարկվարտը Փարպեցու հաղորդմանը նշանակություն չի տալիս: Նա գտնում է, որ Վոսմաշապուհը ոչ թե անմիջապես, այլ ավելի ուշ է հաջորդել խոսրովին: Իսկ մինչ այդ երկիրը կառավարում էր հազարապետ Առավանը: Մաշտոցն արքունի ծառայության է մտնում Առավանի հազարապետության ժամանակ. «առ հազարապետութեամբն աշխարհիս Հայոց՝ Առաւանաչ ուրումն»: Պատահական չէ, որ Կորյունն այստեղ որևէ Արշակունի թագավորի անուն չի տալիս:

Մարկվարտը Վոսմաշապուհի գահակալության սկիզբը դնում է 398/9, Ահառյանը՝ 399, Պատկանյանը և Էմինը՝ 400, Ակինյանը՝ 400/1: Ակինյանը հենվում է Անանունի արքայացանկի վրա, ուր ըստ նրա կազմվել է 415 թ. «Վոսմաշապուհի մահվանն ետքը և Արտաշեսի գահակալութենեն առաջ»:

Այս թվերն ամենից ավելի ճիշտ են արտահայտում Վոսմաշապուհի գահակալության սահմանագիծը: Եթե Մաշտոցն զրեբը հեղինակել է Ասորիք գնալու առաջին տարում, որ Վոսմաշապուհի իշխանության հինգերորդ տարին է, ապա նրա գահակալության սկիզբը պետք է ընդունել 400 թ. (405—5), իսկ եթե երկրորդ տարում, որ Վոսմաշապուհի վեցերորդ տարին է, ապա այն ընկնում է 399 թ. (405—6):

Այդպիսով Վոսմաշապուհի գահակալության տարին (399/400), որ տարբեր աղբյուրներից և անկախ արտածել են Մարկվարտը, Ակինյանը և ուրիշներ և զրեբի գյուտի թվականը (405), որ արտածվում է Կորյունի ժամանակագրական ցանկից, փոխադարձորեն հավաստում են իրար:

Հայոց զրեբի գյուտը կամ հայ դպրության սկզբնավորումն տեղի է ունեցել 405 թ.:

ДАТА СОЗДАНИЯ АРМЯНСКОГО АЛФАВИТА

Доктор филол. наук А. А. МАРТИРОСЯН

(Резюме)

Дата создания армянского алфавита точно еще не установлена. Предлагаемые учеными даты колеблются в пределах 30 лет. Время создания армянского алфавита в «Житии Манитоца» Корюна указано на основании хронологии персидских царей, но оно не согласуется с их хронологией, принятой в исторической науке вслед за Нёльдеке. В статье предложено новое толкование текста Корюна—сохраняются все даты, указанные Корюном, а также на основе древних источников пересматривается общепринятая хронология персидских царей конца IV—начала V вв. Текст «Жития Маштоца» дошел до нас без искажений. Армянский алфавит был создан в 405 г.